

Radøy kommune

Saksframlegg

Saknr	Utval	Type	Dato
081/2018	Formannskapet i Radøy	PS	22.11.2018

Sakshandsamar	Arkivsaknr.:	Dokumentnr.:
Bente Kopperdal Hervik	18/36	18/16482

Søknad om redusert halleige under Manger cup

Saksopplysingar:

Bakgrunn

Radøy/Manger fotballklubb søker om redusert leige eller tilskot til å dekkja leiga for Radøyhallen til gjennomføring av Manger cup. Manger cup er ei fotballturnering for born i alderen 6-13 år som vert gjennomført i Radøyhallen over fire helger i november og desember kvart år.

Saka var oppe i formannskapet i møte 4. oktober sak 060/2018, der den vart utsett. Formannskapet bad i samband med handsaminga av denne saka om ei eiga sak om leigesatsar for aktivitetar for born og unge i Radøyhallen. Denne vart vedtatt i formannskapet 8. november sak 073/2018.

Vurdering

Manger cup har gått føre seg over mange år, og har etter kvart vorte ei godt etablert fotballturnering for dei yngste laga. Storleiken på Radøyhallen gjer at det berre er mogleg å spela ein kamp om gongen, med unntak av laga i dei yngste aldersgruppene, der det er mogleg med to kampar om gongen. Turneringa må difor gå over fleire helger for å avvikla alle kampane, og idrettslaget meiner at halleige dermed ein nokså stor utgiftspost samanlikna med tal på kampar.

I budsjettet viser Radøy/Manger fotballklubb til utgifter til halleige på kr 15 000. Ut frå satsane for leige av Radøyhallen kostar det kr 12480 å leiga idrettshallen i fire helger, og i tillegg kjem leige av ungdomens hus for kr 4480. Manger cup har gjort avtale med ungdomskoordinatoren om å bruka ungdomens hus gratis under Manger cup. Dette tilsvarar altså 4480 kroner i redusert leige.

Radøy kommune har vedtatte satsar for leige av Radøyhallen der lag og organisasjonar i Radøy kommune får leiga hallen til redusert pris i høve til privatpersonar, næringsdrivande og lag og organisasjonar frå andre kommunar.

I møte i formannskapet 8. november sak 073/2018 vart det innført gratis leige i idrettshallen og bassenga i Radøyhallen for idrettslag tilknytta Radøy idrettsråd og for aktivitetar for born og unge (0-19 år). Gratis leige gjeld faste treningar, og i tillegg arrangement som er ein del av regionen, kretsen eller idrettsforbundet sine terminfesta stevner, seriespel og turneringar. Turneringar, stemner og einskildarrangement som kjem utanom dei terminfesta aktivitetane, skal fakturerast etter gjeldande satsar. Desse reglane gjeld frå 2019,

Likebehandlingsprinsippet gjer at rådmannen vurderer det som vanskeleg å fråvika dei faste satsane for Radøyhallen. Eit avslag på søknad om redusert leigepreis i Radøyhallen til Manger cup, som per i

dag ikkje er ei terminfesta turnering, er også i tråd med vedtaket i formannskapet 8. november om leigesatsar i Radøyhallen slik det vil gjelda frå 2019.

Manger cup hadde i 2017 eit overskot på kr 33641. I 2018 er overskotet budsjettert til 50 000. Redusert halleige er såleis ikkje avgjerande for at cupen skal kunna gjennomførast.

Saka var til høyring i Radøy idrettsråd før saka vart lagt fram i formannskapet 4. oktober. Radøy idrettsråd rådde då til til at kommunen vurderer redusert husleige i Radøyhallen for Manger cup.

Konklusjon

Radøy kommune har vedtatte, faste satsar for leige av hallen. Likebehandlingsprinsippet gjer at det er vanskeleg å fråvika desse satsane. Budsjettet for Manger cup viser eit overskot på 50 000 kroner. Redusert halleige er såleis ikkje naudsynt for at arrangementet skal kunna gjennomførast.

Rådmannen sitt framlegg til vedtak:

Radøy/Manger fotballklubb får ikkje avslag i leigeprisen for Radøyhallen for gjennomføring av Manger cup utover at dei får låna ungdommens hus gratis.

Formannskapet i Radøy - 081/2018

FS - handsaming:

Ordførar Jon Askeland ba formannskapet vurdere habiliteten sin på bakgrunn av nært slektskap med styreleiaren i Radøy/Manger FK.

Formannskapet kjende Askeland inhabil, og han deltok ikkje i handsaminga av saka. Varaordførar Jostein Borlaug overtok som møteleiar i denne saka.

Formannskapet drøfta saka, mellom anna om i kva grad arrangementet går med overskot skal ha betydning for vurderinga av søknaden. Det vart peika på at situasjonen ville vore annleis dersom Mangercupen hadde vore terminfesta i Hordaland fotballkrets sin regi. Formannskapet konkluderte med at søknaden om redusert halleige ikkje er i samsvar med vedtekne retningslinjer. Samtidig vart det vist til at laga vil få betydeleg reduserte kostnader ved at kommunen no innfører gratis leige i idrettshallen og bassenga i Radøyhallen for idrettslag tilknytta Radøy idrettsråd og for aktivitetar for born og unge (0-19 år).

Formannskapet vedtok rådmannen sitt framlegg til vedtak.

FS - vedtak:

Radøy/Manger fotballklubb får ikkje avslag i leigeprisen for Radøyhallen for gjennomføring av Manger cup utover at dei får låna ungdommens hus gratis.

Vedlegg:

Søknad om redusert halleige under Manger cup

Støtte til Manger cup 2018

REFERAT Radøy idrettsråd styremøte 06.09.2018

Vedlegg til søknad om redusert halleige

Vurdering av leigeprisar for halltid i Radøyhallen for born og unge

